

**ZAKON  
O GRADU LIVNO**

# **ZAKON O GRADU LIVNO**

## **Član 1. Predmet Zakona**

U skladu sa uvjetima iz člana 5. stav 3. Zakona o principima lokalne samouprave u Federaciji Bosne i Hercegovine ("Službene novine Federacije BiH", br. 49/06 i 51/09) ovim zakonom uspostavlja se Grad Livno, određuje njegova teritorija, propisuje svojstvo, organi, način izbora gradskog vijeća i gradonačelnika, uređuje donošenje privremene statutarne odluke, donošenje statuta, raspisivanje izbora i druga pitanja od značaja za primjenu ovog zakona.

## **Član 2. Teritorija**

Teritoriju Grada Livna čine sva naseljena mjesta koja su se prema evidenciji Federalnog zavoda za statistiku nalazila u okviru općine Livno na dan stupanja na snagu ovog zakona.

## **Član 3. Svojstvo**

Grad Livno je jedinica lokalne samouprave i ima svojstvo pravnog lica.

## **Član 4. Samoupravni organi**

- (1) Samoupravni organi Grada Livna su Gradsko vijeće i gradonačelnik.
- (2) Samoupravni organi Grada Livna poslove iz svoje nadležnosti vrše u skladu sa ustavom, zakonom i Statutom Grada.
- (3) Mandat vijećnika Gradskog vijeća i gradonačelnika je četiri godine.

## **Član 5. Gradsko vijeće**

- (1) Organ odlučivanja Grada Livna je Gradsko vijeće.
- (2) Broj članova Gradskog vijeća određuje se Statutom Grada u skladu sa zakonom.
- (3) Gradsko vijeće Grada Livna bira se demokratskim putem na neposrednim i tajnim izborima na području cijelog grada.

## **Član 6. Gradonačelnik**

(1) Izvršni organ Grada Livna je gradonačelnik.

(2) Gradonačelnik Grada Livna bira se u skladu sa Zakonom o izboru, prestanku mandata, opozivu i zamjeni načelnika općina u Federaciji Bosne i Hercegovine ("Službene novine Federacije BiH", br. 19/08).

## **Član 7. Statut**

(1) Grad Livno ima Statut.

(2) Statutom Grada Livna propisuje se i uređuje samoupravni djelokrug grada, njegova obilježja, sjedište, javna priznanja, organizacija, ovlaštenja i način rada njegovih organa, međusobni odnosi Gradskog vijeća i gradonačelnika, oblici neposrednog odlučivanja građana, saradnja sa drugim jedinicama lokalne samouprave i druga pitanja od značaja za grad.

(3) Statut Grada Livna mora biti u skladu sa Ustavom Federacije Bosne i Hercegovine, Ustavom Kantona 10 i federalnim i kantonalnim zakonodavstvom.

(4) Statut Grada Livna priprema i usvaja Gradsko vijeće dvotrećinskom većinom vijećnika Gradskog vijeća.

## **Član 8. Pravno sljedništvo**

(1) Grad Livno je pravni sljednik Općine Livno i ima ustavom i zakonom određene nadležnosti grada i preuzima nadležnosti, prava, obaveze i imovinu općine čiji je pravni sljednik.

(2) Vijećnici Općinskog vijeća Livno i načelnik Općine Livno, izabrani na općinskim izborima održanim 2. oktobra 2016. godine, stupanjem na snagu ovog zakona nastavljaju raditi kao vijećnici Gradskog vijeća i gradonačelnik Grada Livna.

(3) Općinski organi uprave i upravne organizacije, stručne i druge službe i drugi općinski organi, stupanjem na snagu ovog zakona, nastavljaju raditi kao organi i službe Grada Livna.

(4) Javna preduzeća i javne ustanove, čiji je osnivač Općina, nastavljaju raditi kao javna preduzeća i ustanove Grada Livna.

**Član 9.**  
**Privremena statutarna odluka**

Vijećnici izabrani na općinskim izborima za Općinu Livno, održanim 2016. godine, donijet će Privremenu statutarnu odluku Grada Livna u roku dva mjeseca od dana stupanja na snagu ovog zakona, koja će važiti do donošenja Statuta Grada.

**Član 10.**  
**Stupanje na snagu**

Ovaj zakon stupa na snagu osmog dana od dana objavljivanja u "Službenim novinama Federacije BiH".

**PREDSJEDAVALA  
DOMA NARODA  
PARLAMENTA FEDERACIJE BiH**

**Lidija Bradara**

**PREDSJEDAVALA  
PREDSTAVNIČKOG DOMA  
PARLAMENTA FEDERACIJE BiH**

**Edin Mušić**